

德陽縣新志卷七

建置志

古蹟

緜竹故城卽今黃許鎮漢初置又稱緜陽鎮

陽泉故城卽今孝泉鎮蜀漢分緜竹置屬廣漢郡晉廢後復立宋齊因之後周徙晉熙郡治此隋初郡仍遷治晉熙此城遂廢開皇初郡廢十八年改置孝水尋廢舊稱陽泉在緜竹縣北蓋據古緜竹言也

萇陽故城卽今縣治世傳旌陽史傳無之疑西晉初曾置旌陽未久旋廢東晉因之改萇陽唐又因之改德陽也

德陽縣新志

卷七 古蹟

一

一統志云本緜竹地東晉安帝置萇陽縣屬晉熙郡又以南陰平郡寄治於此宋因之齊廢復置周併入晉熙舊志云在縣西北者非是

南陰平故城晉永嘉後以陰平流民僑置南陰平郡及陰平縣寄治萇陽齊因之又置南新巴郡寄治陰平周廢南陰平郡爲南陰平縣唐併入德陽縣寰宇記南陰平郡在縣北浮中山西地理志南陰平在德陽縣西北疑在今隆興橋之左右

姜詩故宅一統志在德陽縣西北華陽國志雒縣汎鄉有孝子姜詩田地宅水經注作沈鄉去江七里姜仕遊之

居鄭少微孝感廟記今德陽縣西北四十里有姜詩鎮  
詩故宅在焉治平中知縣郭震易名曰孝泉又請於朝  
賜廟號曰孝感按汎鄉水經注作沈鄉者是

漢姜孝子詩及妻龐氏故里

國朝董新策

昔游夷陵州姜龐聞在彼今過德陽縣姜龐云在此楚  
蜀兩相蒙莫知所自起君子有令名族黨競稱美人情  
大抵然寧獨姜孝子猗歟姜孝子孝行誰比擬積誠感  
神明貧足供甘旨涌出地上泉日給泉中鯉刑于龐氏  
妻龜勉相終始余家近所居夙夜懷仰止奉母二十年  
譽戾弗可紀劬苦方在疚其如今已矣抔土未經營塵

德陽縣新志

卷七 古蹟

二

鞅驅不已下馬拜荒祠寸心慚欲死不及君當時血性  
化泉水安得千載餘姓名垂鄉里

孝泉鎮謁姜龐祠

陳一泖 竺山

遠遙遙縣江水遠汲不歸姑不喜賢哉孝婦心拾柴烹  
鮮鯉賴得鄰姥殷勤來委曲周旋婦再回婦再回心已  
哀吁嗟子死泉眼開泉眼開心逾苦朝朝暮暮空徘徊  
欲往從之將何補此心難表天難知感化梟獍無已時  
一官江陽令莫慰純孝思君不見陽泉今有延祚寺又  
不見星函古有孝感祠

謁姜孝子祠

張問安 亥白

汲江水奉老母吁嗟我今已無婦代母汲墮江水吁嗟  
我今尙無子一事勝君君不知我有老母仁且慈白雲  
遙遙念親舍却拂征衣拜祠下

姜孝子故里

李光緒

至性無奇節豐碑有特題是爲眞父子始不愧夫妻天  
地孤雲白風煙萬木齊卽今泉廟上魚鳥托安棲

姜孝子祠堂

閩秀 李錫桂

聖朝先教孝飲水共思源祠宇同仙佛蒸嘗勝子孫乳  
鴉巢滿樹慈竹蔭當門活鯉烹何忍清泉潔藻繫

秦宓故宅元和志在縣北五里其地曰三造亭初太守夏

德陽縣新志

卷七 古蹟

三

侯纂三造其門故名益州記云三造亭秦子敕之舊宅  
也寰宇記云其宅縣水衝毀僅有餘跡其地又稱三造  
里亭在墓右鄉人尙能言之蓋年代久遠累修累圯已  
不知幾度經營矣道光十六年知縣裴顯忠倡率邑紳  
曾傳詠父子募捐重建

修三造亭記

裴顯忠

亭名三造誌古也德陽治北衢坊祇曰秦子敕故里元  
和志秦宓宅在縣北五里其地曰三造亭初太守夏侯  
纂三造其門故名余涖邑之暇耆圖問俗得其所謂子  
敕墓蓬顆巋然而亭趾塵毀矣邑之人然皆敬而神之

曰秦公塚昭烈帝之東伐也史謂羣臣多諫不納蜀志所載乃趙順平國賊不在吳數語惟宓力陳天時必無利君臣之契孰若忠武侯者不能制其東行而悲嘆孝直不在子敕疎遠小臣耳攫怒廷爭卒之敗於秭歸崩於永安炎德遂以不振然則興衰之機決諸此舉宓亦深識挺挺忠直者哉世以英辯博通豔稱之末矣陳承祚謂宓慕肥遯之高而無若愚之實豈知宓者哉焉璋竊據徼功趣執之士觸紛亂以缺一切者可勝數哉宓獨絜皓素違埃霧而不悔先主定蜀盡其器能志士并勸時纂守廣漢請爲師友祭酒稱疾高卧至纂三造迨

先主優禮徵召出爲別駕泥盤以求志濡跡以匡時所謂進退之節必可度者耶極其致雖隆中三顧何慝焉宜蜀人至今以爲美談也按志宓縣竹人於漢爲今治黃許鎮地漢隸廣漢郡華陽國志初平中劉焉自縣竹移雒縣城築闕門又云漢時任安定祖以儒學教號侔洙泗有多士秦杜爲首族也宓之賢有自來矣山川遷變城邑沿革今求如李伯仁任定祖等遺蹟湮沒不可獲惟子敕墓與姜士游泉尙存後之考輿地猶得援泉墓以確指其爲何所賢者之生不獨光於當時江山亦假其寵靈也蓋如是哉士游舊祠孝泉歲有祀子敕琴

城荆蔽無爲掃除者余宰斯土六年矣務不暇給今始得表識其墓右建亭祝神橫三楹門前屏焉東南長十三丈西北廣五十二步立碣封樹衛以繚垣邑人士唐崇樸割地曾傳詠捐錢十五萬又募錢三十餘萬助之訖工帥僚友奠于亭謂公遠遊之詩以迎神東巒拱揖縣流鏗然韻動崖谷咸會庭除之下父老農賈來觀者謹呼盈塗且夫有功德於民與風槩之所激勵而鄙薄化服者固宜廟舍于其地余嚮假令閩中大邑封禮張桓侯趙順平侯墓禁樵採攝安岳建賈閩仙瘦詩亭及湯公祠夾江新宿光祿祠夫苞崇忠義有司事也所以

德陽縣新志

卷七 古蹟

五

示邦人貴有德也然皆不數月而興廢斯亭遲六載乃克成爲記其歲月于石鐫名碑陰後之君子知始作之匪易思所久存而子敕若士游流風餘韻藹然被於縣洛之間俊秀仰止知必有奮迅感慨而忠孝踵相接者庶族盡秦杜也不然高軌遠矣豈係於亭之建不建哉

秦子敕先生故里

國朝 趙 嵩 木亭

學士千秋仰旌陽故里存當年憑舌劒滿座詫詞源不爲天頻問安知氣欲吞偉人雄一代豈獨愧張溫

三造亭

鄭王臣

秦君懿文德斐然采藻揚屢辭州府辟林澤恣徜徉懷

玉不自銜終難闕其光太守三枉駕軒蓋溢門牆行廚  
出華膳置酒君子堂賓從盡俊彥吐辭生芬芳緇衣義  
不薄積久聲彌彰我行左縣野山高而水長虛堂幽且  
敞林木鬱蒼蒼竚立結遙想仰視元鶴翔

過德陽三造亭懷古 二首

張邦伸

學士出益州采藻揚華燦賓館縱談天千古稱雄辯其  
詞雖滑稽義足掩羣彥君子重大節懷玉羞自銜太守  
三造廬始從祭酒薦及至駕東征攀轅章切諫上能識  
天時下足救喪亂卓然國士風豈止富詞翰我行縣江  
口山川發蔥蒨緬懷文德姿臨風一浩嘆

德陽縣新志

卷七 古蹟

六

漢季多名材子敕尤高蹈積學窮天人守珍不自耀太  
守慕賢聲冠蓋經三造一朝慶風雲遂以國士報西顧  
天有頭對客語何妙先主東出師連雲建大纛急諫陳  
天時一一中機要當時惜不悟事後徒增悼我來過墓  
門下馬肅瞻眺山水餘清暉臨風一長嘯

過漢大司農秦公故里

陳鈞 陶萬

子敕眞高士風規百代傳只因諸葛出終感夏侯賢北  
伐師原壯東征計已偏笑他張豎子何足與談天

秦子敕故里

李藩 价臣

亂世多雋才動將出處苟子敕非隱淪讀書論尙友正

統明蜀漢豈侈談天口三造與三顧隱隱寸心剖師苦  
諫東征魏先吳乃後丞相能官人哲士同永久伊誰式  
其廬定來賢太守

三造亭

李德揚

閒訪漢司農衡茅何處結荒榛蔓草閒漫聽耕夫說積  
學貫天人豈徒憑寸舌太守三造廬出處昭大節諫主  
東出師至今憾未絕聞言肅瞻拜采藻薦芳潔刮蘚讀  
殘碑杜宇催人別

來鶴樓舊志云在舊藩王府內明僖安王友城分封於此  
樓甫成適有鶴來集因以爲名末年燬於兵燹

德陽縣新志

卷七 古蹟

七

國初卽其地爲公館後遂無有知者道光十六年偕友人閒  
步訪尋古蹟得諸兩池之間乃顏於亭以誌之  
四面鼓樓在縣城十字街中初始無攷或云成化時建明  
季燬於兵燹

國初知縣叢方涵王理復建後因年久材木朽摧乾隆五十  
年知縣七寶重修旋遭回祿次年復修

復修四面鼓樓記

黃河清

天下事無不可爲爲之無不可成也在上有當官之志  
在下有樂善之誠于斯樓見之茲邑有鐘鼓樓志以爲  
成化閒建後廢於兵至

國朝邑令叢公方涵王公理先後俱新之然其詳莫考乾隆

五十一年秋予奉

命來宰茲邑既下車察修廢則茲樓已煥然一新進董事者問之僉稱先是十六年攝邑篆柳侯以樓頗傾頽議修不果至四十八年前令七公集邑士民鳩工庀材俾某等敦厥役及五十年春將葺事而城中大火民居幾燼其半樓燬是年冬復請重建今粗就緒幸吾父母至之可以率之觀厥成也至五十二年秋役竣董事者以成之不易請余爲綜始終紀歲月以告來者謹按今制郡邑皆設更夫處之署側所以時晨夜定晷刻使人勤事趨

德陽縣新志

卷七 古蹟

八

功者也此樓不置等人名非其實豈邑曾爲德州或附舊署斯樓沿而不革歟乃前令竟顏以來鶴雖意欲存舊蹟殆未覈矣樓跨一邑之中層構複閣淑景凌雲嘗晴日登眺則瓦屋四面鱗次城作短垣繚之左縣之水循城東南下西北則縣竹羅江什邡廣漢諸遙山迢遞隱現雲表至於遠近平疇沃野千里桑麻瓜果竹樹之境曠望無際洵古所稱天府者則覽形勝極高明斯樓其可平哉然方其將成而燬也固與街巷市廛同爲焦土並不若曩者尙有遺磚故瓦舊材之可藉也况百堵未集財力維艱使其稍有因循前勞盡棄亦事之常無

足怪者乃諸君黽勉從事卒復舊觀孰謂天下事之有庸有不可成乎哉爾士民勉之凡所爲勸農蠶以厚爾生崇學校以興爾行者願與爾士民相勉以有成而予亦庶以無負於

簡命則斯樓其小焉者也眾曰如吾父母言遂書以爲記

古經樓宋建在儒學講堂右慶元初邑學士章森書碑進士范執中撰記明嘉靖閒知縣羅錦重修教諭柳維撰記萬厯初知縣樊鼎遇重修藏書一百一十八函計四千二百八十二卷有復古經樓碑記并銘崇禎末燬于賊今惟存章書經樓二字碑在孝感書院講堂前

德陽縣新志

卷七 古蹟

九

儒學復古經樓碑記

樊鼎遇

惟夫姪空顯質俱有神理之宗設位流行卽爲文字之祖東壁天書秘府耀炳雙珠西崑地冊靈樞精藏羣玉丹書金版龍關開太昊之圖赤簡綠文滄水授文命之策此皆繩契未造業留呵護隱章然則事豈人謀吹皆天籟出入三光之道環坤腹以奠生周徧九有之民秉分星而別度羌華夷漢所以辨族類而繫萬民複簡隱明所以絕人神而察百物火符雷篆譯之卓有師傅虎畫狐編窺之更奪人巧凡鳥獸鳴動亦喜怒感其誠通或風水激號且宮商露其變狀雖各通其情而天地萬

物之情並見雖各適其性而天地萬物之性竝呈具聖具靈廣矣大矣惟是剛柔徐疾五性殊方專普龐純列國爲政兼之是非同異譎雅俚都自開闢以至獲麟三百二十七萬六千歲萬方所記十紀之書空委宛之巖不足紀其政典鑿觴謨之室不足載其方家周末益以恣橫秦火會應酷虐所以仲尼慈憫萬世約究多經乃定禮樂而修舊章刪古詩而存三百讚易道以除八索述職方以黜九邱斷三墳五典自唐虞約列國史記爲春秋蓋始翦其繁蕪一就典雅刊其躋駁竝受折衷名爲七經道揭千古然後西見柱史藏之王室周流列國

演之疇人修函丈於杏林漁婦誚而罔介講俎豆於宋樹桓魋伐而無危不必七十二君之能行凡有國者不可不知其義不必三千弟子之優聖凡有識者欲使盡讀其書猶恐世有廢興家壁藏蝌蚪古字人懷疑信地機儲絲竹靈音是以秦炬雖炎祇能燼洪荒草創之穴穢漢律初解卽能合諸儒口筆爲篇章自此代置學官經分博士家以之式行國以之官人遂騁絢爛於百家莫能窺其博奧窮精蘊於二氏終不出其範圍備帝王損益之權盡人道綱維之理良定心續命之傳寶宰物經世之懸圖也奠兩楹之夢已兆太牢闕里之時齊衆

喙之鳴何啻一馬天地之喻王都侯國辟雍類宮并傑閣而陳宗器之文峙危樓而藏鼓篋之業嚴始羹牆之地無經籍則眾志不興尊崇絃誦之基非壯麗則真靈不集錦標寶軸卷軼極華淨之方桂棟蘭楹刻鏤窮輪奐之美旁通七畧四部猶懼不足羽翼聖真高亢日牖月欄尙疑未能登閱大道師各重其本教人自悅其家珍易地皆然由來尙矣德陽儒學講堂右隙有宋學士邑人章公森書經樓字碑字體盈尺書法八分嚴整若魯公之儀適麗得中郎之意碑足則有宋進士范執中紀羣公興學盡肯構肯堂之勤碑陰則有明育令夫己

氏鐫卧碑字痕發注金彈珠之嘆窿穹仆而復立則羅令錦弔古興嗟之思典刑晦而復章則柳諭維臨池紀勝之力然委諸草莽石不能言若復其芸蘭人應宏道鼎遇忝蒞茲土幸與斯文慨富有之業不新蓋一令因循一令惟慮始之治難任將後人復笑前人跡雖異代而感長懷忍當吾世而失盛事爲之列上當道白文教興墜之繇因之遠購全經廣學士博通之路恭遇監察御史朱公廬江正學觀海鴻文破柱埋輪曾射狐狼於輦轂銷鋒臥鼓不驚犬豕於封疆駐節而細論文帙括盡談天之奧攬轡而稽興廢建立樹根道之標兼遇本

道大參曹公八閩少逸四海宿宗玉潤冰清藐姑射喻  
其神骨和聲緩節王摩詰似其詩文每錄金石遺言必  
扣巖瀾絕地本省督學魏公名臣嫡裔藝圃宗門藻鑑  
人倫夙擬天曹綱紀衡程方類重新蜀部風猷拔士皆  
得其尤作人於斯爲盛本府太守張公荆楚偉度觚管  
鉅公十載爲郎雞羣驚其野鶴一麾出守蛙部詘以海  
鼇魯諸生半在門牆舊掄才揚馬王嚴之地邑列侯多  
象風指謹追躅李文韋趙之規本府司理楊公洞庭澄  
波祝融朗照平反百獄胡威清畏人知題品羣材山濤  
光膺帝鑒觀仁於過若清獻之不失元公錄善於微卽

平仲之立解越石緣茲從與覆議允行幸遇邑中憲大  
夫曾公家緬魯誥梵笈竺墳紫鱣專臯比之譚白馬演  
龍象之辯立朝正色片言不及私門過里飭躬五尺不  
干孱令趙相國之解脫化其剛稜黃太史之元通得其  
圭棟本學教諭王公鄭子名宗單父清望鷺眸鵠立健  
翮有凌雲之思豹蔚虎文猛氣負開山之力發蒙罔憚  
其煩苦爲道不愛其拮据相與率邑官僚電轟締構共  
鼓通庠衿帶鸞集觀摩螢誦雪吟觸目見琳瑯珠玉牖  
窺山望會心捨階笈筌蹄度其成不逾時教未匝月童  
冠刷羽而翼鴻陸數倍前人賢良燒尾而躍龍門蕪開

二彥於是接境比封之士把袂而來問奇講德之朋填履而入至於道人法子乘杯按躄以印心曹吏山民獻書錄訣以備目先聲以證實效積學自有真儒此皆聖主右文久道逢化成之會亦先師翊教陰隲得感通之神故一時公卿盡擅墨林匠手而四境冠履同任德圃仔肩鼎遇小吏何以獲茲薦紳先生實貺臨此自古獲麟之後至今龍飛之年三十四甲子記載之文方家之說博雅君子之所通考慧心文人之所裁制繁盈鄴架重溢洛車帝室藏書之富代有汗隆高門積裘之多家或偶國漢通七畧三萬三千九百卷隋錄西京三十七

萬卷唐列四庫八萬九千四百卷宋崇文目二萬六千六百六十九卷張茂先入洛載書二十車李公擇山房藏書九千卷宋宣憲校讐定本二萬卷名家藏書如南都戚氏歷陽沈氏等少者數千卷多至四萬卷葉少蘊少貴博收遂逾十萬卷今鼎遇所藏經僅十三史僅二十一子僅二十集僅二通并學宮弟子制傳注性理通鑑綱目及昭代名史數種□一百一十八函計四千二百二十二卷擬古則□不足稱□經□要而匪濫良以多為善姑俟徐徐積儲凡茲散□簡篇皆歷代乾坤精蘊若假神聖筆削斯六經性□文章遠考宋儒馬端臨錄

古今經籍志近見白下焦太史作明史經籍志舉道釋  
兩藏之教卽敘列諸子之中果得刪述方家因之大一  
統類千萬億卷之義自可約爲一篇千萬億卷之文復  
可精藏一字薰蕕何病於芳臭鳧鶴焉較其短長作者  
尙未有人收之不厭其雜尙當備二氏之法寶何況獵  
諸儒之碎金但古今大觀急借閱肆之友終始大業尤  
須堅忍之儒過庭錄言六經子史之善者通不過三千  
卷成人日閱一卷二十年可以再尋歐陽公言九經正  
史通不過四十七萬八千九百九十五字童子日誦三  
百不五年畧可上口徐盛年過八十猶歲讀五經一徧

劉原父初欲窮經卽手寫六經一通茲由淡味義根故  
終身固堅白之好窮菟道奧故畢日游雋永之途先聖  
業筮命盡日中尙取書延晷刻死而後已學之謂何蘇  
子瞻言老儒先生自言少時求史記漢書且不可得得  
則手自書寫日夜誦讀後生科舉之士日見諸子百家  
摹刻易致致則束書不觀游談無根繙朽骨而發陳頤  
精心尙詆爲書肆美四寸而忘七尺密繕且笑爲說鈴  
矧目不徧三篋之藏口惟授一師之說取科第之資不  
足詎天人之際可言期與來學實講之毋以故事虛崇  
尙之也治子學而爲裘謂因五緘爲七屬之用孫郎圖

而索驥至以去父冒山子之名聖人卷繞南面而不釋  
然其所憂者大也小人冠蓋里閭而有態色其所忘者  
多也不成位兩閒靡拓幘幪六子之綱第縻情好爵孰  
詣高明良貴之階諸生感起卽利賓王鼎遇盟期終願  
學孔周呂以公輔爲載公輔有乘蹻跖之時夔龍以餼  
祿養廉餼祿有豸虎豹之日若夫介然抱一物至蓋棺  
而不脫悠然空萬有臨納麓而不驚樂則行之憂則違  
之卷懷靈密鴻寶生乎由是死乎由是歸藏貞耀元珠  
是則堯舜之心至今豈懷山稽天所能溺仲尼之王萬  
世詎炎岡烈澤所能焚匪劉炫之隋墳眞得石經古本

異舒公之周禮親繙竹簡漆書事理罔克溺之沈酣恣  
所取耳興復大義布露微懷估直併上臺司節目副在  
曹案銘曰太虛惟靈涵氣質行剗剖圓方布列星辰經  
緯日月聲列川陵抽莖敷葉縷析條分離形鏤體脉絡  
并森龍圖龜畫馬鬣魚鱗珠光玉彩赭丹黛青風聲雷  
號鳥語獸鳴鬼工神巧傳會聖心思通穆邈理徹元冥  
結想擬化摛詞象鈞祛知簡智閑邪存誠黜浮體實芟  
駁歸純識小識大擇見擇聞百王合符千里印眞易準  
天地孝先溷沌禮本太乙樂超氣聲書陳中極詩道和  
溫春秋刑書亂賊是懲典雅奧博是曰七經道兼覆載

義炳日星萬世素王二論心精異時同學子輿一人周  
官戴記典禮參明爾雅注詩公穀異經十三總錄開元  
所尊諸子百家龐其鱗斌箱輶輪轂合而車行巖廊魏  
闕何材不賓二代角立俶詭幻冥偃師優孟舉止亂真  
俳宣聖旨妙演靈根龍門虎視百代撮英軒皇及漢裁  
綴創新筆劍所擊長短縱橫史匠繩墨文公典型孟堅  
以下嚴秉法程具體肖貌駢偶失神洗華露質削弱傷  
魂夾漈論集通志爰成考度辨惑博物邃生端臨總攬  
通考酌斟憲章備矣禮樂攸存詞章藻績行遠腴身昭  
明之選宏麗和平一洗惡陋單寒浮榛文苑次之披沙

德陽縣新志

卷七 古蹟

十六

鍊金傳注性鑑代制所欽子史諸集極博明經採華摭  
實捐短錄羸道我達意證彼汪心野人質耳君子彬彬  
廣心大畜巨細盡倫唯聖希天乃與斯文

龜勝山道場在縣北二十五里緜陽河北名勝志云龜勝  
山乃高崇文破劉闢處唐元和初闢據鹿頭關高與之  
對壘屯營於此有神龜蹲於牙旗之下識者以爲受降  
之兆果獲大勝因以龜勝名山立道場焉掌書記鄭宗  
經爲之記碑猶存今名海印寺

龜勝山道場記

唐 鄭宗經

維大唐乙酉祀蜀帥薨鎮其倅曰闢盜庫兵脅市人逆

命於蜀門毒彌浸淫軼制踰封自左縣抵黔渝八郡五  
十城俘掠單產驅逐守吏四面攻焚烟塵晝昏明年皇  
帝嗣寶位會朝神京采衛冒甸蠻貊君長偕集庸蜀不  
至乃授南平王太乙靈旗玉節油幢統禁衛太原馮翊  
扶風之師問罪於岷陽越三月師次葭萌賊將宵遁涪  
潼以避我鋒涪濱萬戶隨師而復夏六月賊又成城於  
鹿頭列柵於此山公移師習乃次山下視其鑿峻址以  
迴塹架層峰以結櫓旗轉霞光鼓雷雲中謂制勝在德  
義行權在形勢勝而臨之示建瓴之易也乃召中軍將  
以短兵二旅魚貫而登闢黨候鋒而殪者什四奔墮崖

谷而斃者又什二則向之險固反爲我資公乃開玉帳  
以建牙旗列霜戟以周崇壘下瞰賊城如在掌中與都  
監使劉公監軍使徐公觀變禦敵分營守要自是兇徒  
居則魄悸魂落出則輿屍折首面縛倒戈請命轅門因  
命降者先導銳師繼襲氛氲氣象遂清岷峨帝授公所  
封之士以守之所活之氓以字之公威肅其令仁敷其  
政和氣煦之金瘡盡平退食之暇延想所歷以戰骨雖  
瘞遊魂尙痛非大聖之力不能息苦海非象設之教無  
以聳善心乃命庀徒鳩工度材揆力紺宇俄就絕如化  
城嚴鼓息而振金鐘戰聲寂而流梵響慈惠所庇菑疾

□生峨峨金界擢秀羣嶺公初宅此營有神龜由壁門  
來於牙旗之下公命投之遠礮翌日重至議者介蟲之  
長介胄斯服蜀有龜城其城是師卽日乃受降此山旣  
靈及其祥遂以名龜勝山因以山名道場

孝泉舊呼姜詩泉在縣西北四十里詳見山川

梅泉在縣東山天宮堂下詳見山川

望秦樓舊志云在縣北三十里相傳唐明皇幸蜀從軍於  
此回望長安又云蜀王娶秦女過此回望咸陽二說互  
異或仍是爲秦子敕作也不知始於何時今所在已無  
攷姑從舊志存之

德陽縣新志

卷七 古蹟

十八

蘆林遺址舊志云在縣北三十里距孝泉十餘里相傳卽  
孝婦龐氏出止隣姑家拾柴烹魚供姑與姜詩相會處  
平蜀臺一統志云在縣北二十三里元和志云鄧艾以景  
元四年征蜀大破諸葛瞻於縣竹築臺以爲京觀又名  
煉景臺其義未詳今遺蹟已不可攷度其形勢總應在  
黃許鎮左右或卽因鹿頭關增築之元和志謂高二三  
丈縣互數里上有九泉水皆自涌豈人力所爲乃傳聞  
之謬也

飛雲洞在縣西北四十里詳見山川

仙女洞在縣西北三十里詳見山川

仙女洞

李調元 雨村

橫江鐵壁垂水溜滴成洞天工巧煅鍊琢石爲屋棟聞  
昔有獵夫搜山失其眾忽遇兩神女採藥相戲弄便從  
後尾之徐退恐稍縱翩躚轉山曲投身入石縫雙環門  
自關叩戶撼不動但聞搗臼聲隱隱如鳴甕恍若出天  
臺不邀仙子送此語傳人間恨較劉阮痛至今洞已開  
仙跡渺難供空餘鍾乳流不知作何用惟見兩石人馳  
馬猶銜鞚我來訪靈蹟撫事一增慟駐顏少金丹誰賜  
桃花種掉臂猶相失後來況敢夢惟應每歲來花開聽  
鳥啁

德陽縣新志

卷七 古蹟

十九

龍井在北較場後邑人於此祈禱甚有應驗嘉慶中署縣  
事賀懋椿爲之欄檻特建坊以表之

龍井記

賀懋椿 邑令

井以龍名紀靈也余於甲戌春權篆德陽會夏旱徧禱  
罔應心如熏焉時王少府云邑東北隅有井祈雨輒驗  
余聞之卽約各寅恭步行虔禱越日甘霖滂沛歲則大  
熟僉曰井之靈也余以爲非井之靈殆有靈物憑焉耳  
易曰木上有水井君子以勞民勸相抑聞吳都龍穴內  
蒸雲雨所儲古室銘曰水不在淡有龍則靈其是之謂  
乎井地頗湫隘向無名余感其靈之昭昭也因以龍名

並爲豎闌植坊以誌其靈云爾

龍湫在老君觀禱雨輒應未詳所始鄉人賴之以濟亢旱八角井在孝泉延祚寺側相傳有龍潛其中常以護塔聖水泉在因聖寺俗名洗眼泉相傳寶月禪師卓錫於此泉中潛龍嘗出化爲人與禪師往來巖字石刻譜云德陽因聖寺有宋政和癸巳邑令成都鄭少微撰碑記高陵李隲題書法似聖教序

瘞金圃舊志在縣署後爲許真君瘞餘金處明萬曆初邑令傅順孫曾獲金鼎于圃中又有鍊金臺乃真君以仙術鍊石爲金時所築今廢

德陽縣新志

卷七 古蹟

二十

鹿女祠在縣西二十五里舊志云昔有夫婦避兵於此產女懼啼棄之林麓穴中穴近寺適寶月禪師靜修不忍聞女啼飢咒鹿乳之年餘無恙師因畜爲己女及笄而字之後人遂以名其廟今古碑雖剝蝕猶存鹿女祠數字

鹿女祠

李復陽

無復當年鹿女祠居民猶識舊時基高僧度世眞如佛野獸銜花解哺兒果下猿馴能共狎夢中虎乳未爲奇莫言稗史荒唐事留待他年絕妙辭

鹿女祠

馬榮桂 小山

異類何緣乳哺能慈航借賴度高僧棄兒啼夜驚禪定  
呼鹿通靈仗法繩尙見叢祠寒宿草空悲祖燄失傳燈  
世閒逸事非全幻后稷詩稱鳥覆冰

德陽王藩府相傳在縣城西所在無攷舊志云在來鶴樓  
前而樓蹟亦無攷或以四面鼓樓當之然來鶴樓在王  
府內鼓樓在十字街心按其形勢必不相符舊志城北  
有越王樓攷新舊唐書太宗第八子貞封越王後爲豫  
州刺史惟杜少陵詩言爲縣州刺史然終唐之世德陽  
不隸緜州貞安得越境而造此樓况州志城西北自有  
越王樓則此卽來鶴樓之誤可知今北街公館後垣外

德陽縣新志

卷七 古蹟

二十一

兩池並在非天池明月池而何豈非藩府之遺蹟歟  
蜀府王莊在縣東北十五里迴龍寺有碑萬厯十年建碑  
首刻蜀府王莊四大字其文已漫漶不可讀又縣東南  
湧泉左右亦相傳爲蜀府王莊

龍護塔在孝泉鎮延祚寺左姜公祠右卽所謂雒縣塔也  
阿育王傳云王以舍利所在命鬼神取西山大石爲之  
基隋大業初僧道卓始造木浮圖西南數武有八角井  
神龍常居之以爲塔護不時見像然自隋迄唐宋皆木  
塔也而磚塔之建則始於元順帝至正二年安西人趙  
文德發願獨修塔十三層至七層而中止其弟趙文禮

續修六層至正十三年告竣前後經十二年而塔始成  
明成化十七年僧明湛補葺塔巔正德十三年僧寶印  
置琉璃寶頂迨

國朝乾隆二十五年僧禪宗培修塔脚乾隆末年有犴人攀  
援而上毀其頂僧寂穩爲之振新嘉慶十六年住持天  
祥又培補之

古雒縣塔記

太元上人

聖塔乃佛教中一大事一法相也蓋聞益州三塔同一  
石蓋名大石基阿育王傳云爾時育王往詣雞頭摩寺  
上座耶舍前合掌白言我今於閻浮提內造立八萬四

德陽縣新志

卷七 古蹟

二十二

千寶塔座荅言善哉我於大王造塔之時以手障曰可  
遍勅國界盡起立塔故相傳云是鬼神奉育王教西山  
取一大石爲塔基以舍利在故其相亦同名大石基也  
一曰福感二曰晉源三曰雒縣塔自隋唐貞觀年初有  
三律師曇摩掘誅律師覲事修崇時有護法神王見形  
擁衛旱澇禱應故名福感曩時益州郭下法成寺沙門  
道卓有名僧也大業初雒縣塔無人修葺纔有下基卓  
乃率化四部造木浮圖莊飾備矣塔爲龍護居在西南  
角井中時有相現側有三池莫知深淺三龍居之人莫  
敢臨視貞觀十三年三龍大鬪雷霆震擊水火交飛久

之乃靜塔旁本住人皆拾取龍鬚長三尺許黃赤可愛  
蓋塔之功德詳見於大藏中星字函載之實也其姜詩  
孝義亦具同星字函內則古跡第宅名譽該屬雒縣之  
鄉里也寺塔祠一基所建東曰孝子祠中曰峯堵波西  
曰延祚寺塔去西南十步八角古井一派三池清淵不  
涸含潤四生天龍呵護士庶呈祥令見聞者卽相起信  
出信悟心但隨喜者拜贊係之以辭曰善哉無上大法  
幢鎮此西蜀之名邦邦人晉熏和見香仰瞻佛日增輝  
光願此功德江漢長羣迷永藉爲津梁雨暘時若國富  
康本支萬世傳無疆 篇中多錯誤字無從攷正大元

德陽縣新志

卷七 古蹟

二十三

一作大圓

初度日游孝泉登古雒縣塔

曾守身

漫謂浮生說大年且從靈境覓清泉雙鱗竝地仙風遠  
一塔擎天佛日懸芳草壺觴淹小海夕陽車馬促先鞭  
因問姜龐壽何似至今神采動山川

方塔夜鐘 并序

國朝 李 莪 邑令

蜀中少樓初遠望之以爲何忽得此卽之則塔也高齊  
樹杪在寺與祠之中閒有十層鐘卽在五層上不記其  
年號亦莫詳其姓字每朔望早晚僧者擊之初昏亦習  
事耳僧者早起則寒山之夜半也鐘則猶是聲亦猶是

而自高空而來覺與尋常不同霽月舒遲歸鴻送遠泉  
流雜響滴露堪希大梵凌空勞塵俱寂三聲淚下一粒  
沙無矣遑問害馬去與否真不復知有人間世也僧書  
嘗云聽鐘聲鐘聲從此不可聽

亭亭樹杪起岑樓只有青天在上頭出塔靈音通梵界  
聲聲敲動早霜秋

陵墓

蠶女墓在縣西二十里石亭寺昔帝高辛時蜀無君長有人爲鄰境所掠者其妻誓曰能還吾夫卽妻以女其家馬絕絆而去數日駝其夫歸馬見女輒嘶鳴妻以誓告夫夫怒殺馬而曝其皮女過於側皮捲女飛去異日得皮於樹上女化爲蠶故後世養蠶者供馬頭娘其墓在德陽縣竹什邡界事見搜神記存之以廣異聞

蠶女墓

周紹濂  
霽堂

昔在高辛時蜀地無君長弱肉強之食人民肆獯獪有夫行其野誤觸鄰部網子身爲人奴不得見親黨孤雌

德陽縣新志

卷七 陵墓

二十五

念故雄忽作匪夷想誰能歸乃夫弱女給廝養家馬性素馴二朝倏絕鞅出門望歧路茫茫失所往郎君乘馬歸意氣何俊爽相見如夢寐驚定重儻慌菱花合舊鏡蘭橈蕩新槳看花人影雙對月酒杯兩阿女聞父回靚妝啟羅幌且盡人事歡那復憶疇曩其馬日伏櫪芻豆噤不饗見女輒嘶鳴似訴心怏怏詢婦知誓言夫怒髮指上人畜本非偶何物敢相彊清水厲白刃殺馬供朝饜食肉曝其皮皮大形骯髒女適過皮側捲女如繭盎隨風杳然去夫婦意悽惘偶見陌上桑桑葉正穰穰女身化爲蠶見母首昂仰食葉吐成絲萬世衣被昉是爲

馬頭娘蠶家奉肸鬻我聞西陵氏佐帝蠶事掌茲稱女  
化蠶其言毋乃慌復聞有墓存此事尤莽蒼滄桑幾灰  
劫陵谷忽異象壘然兒女冢大地一塵塊誰能辨兆域  
億載留天壤里人指向予好古情堪賞元珠何處求予  
欲問象罔

漢

將軍墓在縣西二十五里迴龍菴內未詳所葬何人相傳  
爲何武墓有碑字已漫滅按武封汎鄉侯墓在郟縣南  
門外岷陽書院後不在此華陽國志云雒縣汎鄉有姜  
詩宅汎鄉卽今孝泉水經注作沈鄉者是以形相似而

德陽縣新志

卷七 陵墓

二十六

誤字又作繩乘皆以音相近借用俗又呼安安爲沈香  
子亦流傳未變之一證也華陽國志云涪縣陽泉大司  
馬蔣琬葬此晉廢陽泉入涪將軍豈卽其人歟

姜詩 龐氏 安安三墓並在縣北四十里孝泉場

姜公三墓碑刻

朱運昌

先生大孝世稀有先生雖沒名不朽三墳鼎峙子依娘  
婦姑地下以相守

寒食姜詩墓觀賽會

李調元 兩村

姜公邱壠絕樵蘇寒食千家挈酒壺百道靈泉猶躍鯉  
萬年宰木尙啼烏赤眉當日防驚孝黔首今朝共賽巫

同是陳人偏血食幾多村墓紙錢無

秦宓墓在縣北五里俗呼五里堆

秦子敕墓

二首并序

國朝 王一正

子敕名宓漢縣竹人墓在德陽縣北五里而兩邑並不知其所在茲於道左見片石卧孤冢下拂而視之乃先生墓也然耕犁相促墓外無餘地矣

嫩草殘蒿土一堆平田片碣卧莓苔誰知此處埋英骨  
慘淡陰風習習來

一畝春田古墓孤四圍瑩兆野犁屠行人莫訝低徊久  
只恐重來碑也無

德陽縣新志

卷七 陵墓

二十七

秦宓墓

李調元

兩村

官本司農秩人呼祭酒村兩朝天有姓三造地無存城  
郭縣江浸鄰家落漲痕永安遺命日應恨此中魂

司馬孟臺墓未詳所在巖字石刻譜云碑高一丈二尺廣  
二尺八寸厚一尺六寸刻畫工奇面刻故上庸長司馬  
孟臺神道碑十一字八分書銘文皴剝字札甚精

司馬季主墓名勝志道迹經曰德陽縣東二十里隸上治  
季主先生學道飛仙之所上應女宿按真誥云司馬季  
主漢人也得道尸解留枕席以代形粗似其身不異家  
人乃葬於蜀昇盤山之南諸葛亮爲之碑讚今並昇盤

山之名亦無知者按舊志云馬鞍山有洞通玉皇觀又云東山後有洞石門半開隱見石棹等物或卽其地歟

明  
曾傳墓在縣西二里

曾守身墓在縣西十五里

孝子辛中魁墓在縣西三里

王國正墓在縣北三十里

王國祥墓在縣北三十里

王擢墓在縣北二十七里

張雲翰墓在縣東二十五里

德陽縣新志

卷七 陵墓

二十八

羅世守墓在縣北五里

百七老人墓在縣北一里文昌宮前舊志云碑記生於正德年間卒於崇禎七年六世孫葬 舊志又有七賢墓事蹟無攷張上行墓不云所在附記於此

杜可教墓在縣西十二里

國朝

何大士墓在縣東二十里東嶽廟

馬元墓在縣北三十里金鷄橋

馬聯芳墓在縣北三十里金鷄寺

馬希尙墓與父馬元墓同塋

馬志修墓在縣北三十里鳳皇堆

馬儒修墓在縣北三十里李家營

汪世源墓在縣西十二里苞桐林

李濂墓在縣北一里黃膠堰側

曾慎墓在縣北三十三里三板橋

張道華墓在縣東二十五里張家墳

曾彰泗墓在縣北三十三里縣竹縣界

張邦伸墓在縣東二十里周家山

雲谷張公墓誌銘

李元太初

張雲谷先生諱邦伸字石臣漢州之后營人故籍楚麻

德陽縣新志

卷七 陵墓

二十九

城明初遷蜀之榮昌國初曾祖連義公始徙漢居之祖

冠玉公諱奇瑞州貢生父凌霄公諱越州廩生俱以公

貴

敕封文林郎贈如其官兄諱仁壽字如南廣西布政司經歷公

居其次凌霄公嘗夢遊瑩華山有白猿躍肩上化爲童

子曰瑩華侍者奉命爲君子已而公生越一載凌霄公

卒母程孺人茹荼而撫之曰務以文學世其家公年十

六補弟子員二十四舉於鄉屢上春官不第乾隆丙戌

聖天子方雅意作人舉大挑

盛典俾寒畯得及時自効公與挑得高等以知縣用籤掣河

南借補光州州判判署分駐息縣之烏龍集壤接安徽羣盜往往出沒其間公捕渠魁治以法羣盜斂迹去辛卯光州蝗起公奉文捕之令人掘渠數丈以布蔽其一面如城數百人持拍筴逐至蝗爲布所阻輒墮渠杵令死夜則燃火其處誘蝗撲火光迫之亦墮渠死仍懸價購餘蝗之不及逐者一二日蝗絕蝻竟不起是歲也蝗而不害布政使何公聞之曰此出力捕蝗第一員也明年補襄城縣知縣縣爲通衢使者車馬絡繹於道民病役不均公籍有車馬者爲輪法均其役凡十三月而役一周其車馬有登下者以時增減各如簿官民至今便

之縣有常平義倉每歲春發秋斂加息一斗而倉役恣爲奸假鼠耗倍其息零尖踢斛又倍之公僅取息一斗餘盡捐之而嚴禁倉役之作弊者民戶入穀往往獲羨餘而歸乃相率以其餘者傾入倉公怪問之曰曩者倍數而來穀不足今者如數而來尙有餘民受其賜多矣顧惜此粢粢也襄城名勝之區向多古蹟如穎橋者鄭穎考叔故里龍門者漢司空李膺故里首山者黃帝訪道處馬跑泉者漢光武駐軍處汝水湛坂皆水經所載各爲榜聯以表之政理民和案牘清簡明年遂無繫獄者囹圄虛無人獨遞解流囚宿焉父老來觀指爲解囚

傳舍也甲午固始災饑民欲爲變大憲調知固始縣事公下車先曉以大義使各定厥居然後請帑銀五萬兩按極貧次貧例分別給口糧籽種計賑五十餘萬口其漏冊者又萬六千餘人爰設粥廠男女異所俾學官司之公日巡其處至則嘗粥而後分給使書役不敢竊米雜灰滋弊時孕婦多產育有日產五男者別賃廡居之厚其養使不及於病凡捐倉穀六千餘石而全活眾矣縣有報殺其女者民自外歸門閉不啟掇入之女縛柱而縣塞其口以死無姦亦無失物公驗之併驗得後墻足跡密令民確檢所失而密以告果失錢四千布袋一

條問有見此錢者乎曰表兄某曾見之且向借未與因飭民自邀其戚族鄰人集庭下有不至者以賊論已而畢至某亦至公點名逐一目之至某色動點畢拍案大叫曰得賊矣某益色驚遽詰之吐實問錢袋安在曰棄之池涸而取之真贓也一時服其神明計典卓異入覲歸仍知固始縣事縣有清河曲河湛河引灌圩田爲一邑

之水利歷年溝淤益積而高水益退而下水有及溝不及溝而訟興焉公喻民按畝均夫按籍徵草歲一挑濬每於十月以後二月以前舉行逾年溝低水高溝以次受水水以次入田無病旱者考城黃河決大憲檄公往

治之河闊十八丈有奇往者夫役足陷泥淖中施畚鍤不便公令先濬河心闊三丈許使水趨中流兩旁淤泥漸涸爲浮沙而從事焉事半功倍矣負土兩岸約一丈以外積如邱阜因以固隄防計自青龍岡以下長二十餘丈兩旬而畢功大憲嘉其成功之速將擢汝州或鄭州議未定適公以母程孺人病請告終養而程孺人壽終固始官署矣扶柩西歸年四十五歲正古人強仕時也服闋後遂棲隱不出初合州有李道人者國初鎮遠將軍芳述之弟也計年百餘歲矣乾隆丙戌公遇之於汴城謂君有夙根將授金丹公以祿養辭道人曰他日

德陽縣新志

卷七

陵墓

三十二

急流勇退人也至是果如其言公家富圖籍杜門快讀異書尙如諸生時訓課諸子得登賢書者三人公修宗祠賑族黨調鰥寡孤獨之無告者同年友某宦江蘇以事繫刑部獄公爲歸其孥於蜀業師高白雲辰卒遺妻晉氏老而貧公膳養至二十餘年無倦色其勇於好誼如此也公好爲詩歌約四千餘篇手自刪減僅存集八卷行於世其他著述有光郡通志六十八卷汜南詩鈔四卷熱河紀行草一卷全蜀詩匯十二卷固始縣志二十六卷雲棧紀程八卷唐詩正音十卷明七律選二卷地理正宗八卷排律韻薈四卷古繩鄉紀畧十二卷錦

里新編十六卷維桑集十卷雲谷文鈔四卷慶誕記一卷嘉慶癸亥十一月二十五日方宴客談笑飲食如常其夜無疾而卒距生乾隆丁巳三月初八日壽六十有七元配徐孺人繼配沈孺人俱先公卒子八人長懷洵辛酉舉人次懷漑甲寅舉人次懷渭辛酉舉人次懷潞監生次懷潼次懷沂次懷澂次懷澣俱幼女十二人長適宜賓縣訓導朱廷珠之子映暘次適邑庠生汪朝宗之子文祿三適陝西寧夏縣知縣王畊之子易珍四適金堂縣陳惟觀之子汝德五殤六適南籠太守唐樂字之子張蘭九適廣東紫泥司巡檢孟印之子元章餘未

德陽縣新志

卷七 陵墓

三十三

字孫八人懋中懋祿懋炎懋嘉懋豫懋直懋科懋卿俱幼嘉慶庚申公由漢州避教匪亂遷居成都余亦病休寓省居相近志相得也暇日讀公所著書併識其居官廉明狀甲子秋歸窆有日矣孝廉君懷洵等奉公年譜來乞余誌因按譜撮其政治之大者敘次如右而系之銘銘曰於惟雲谷古之人與服官不十五稔而水旱與俱民各寧其居林下二十餘載而遺榮甘蔬樂我琴書在國爲循吏在鄉爲鴻儒詩書貽後慶也有餘城開滕沈墓樹粉榆琢石紀之惟懷永圖

曾應鐸墓在縣東四十里福興溝

曾恕墓在縣南三十里寶珠寺側

曾中菴先生傳

國朝 曾 燠

公諱恕姓曾氏字中菴號貫齋平武訓導天木公之長子原籍山左明之中葉先世有宦游在蜀者家於中江國初遷居德陽竝占籍焉公稟姿奇警有幹略成童讀書曰數千言試輒冠軍乾隆己酉科拔貢以州判注選乙卯簽發河南時苗疆不靖主帥福重公才委辦營務事平任湘潭邑爲雲貴通衢貨財叢集有巨盜劉蠻子爲患黨連邵新諸邑白晝剽掠莫敢誰何素稱難治公莅任日訴卷如麻皆令靜候次日民之入署揆伺者見衙齋

德陽縣新志

卷七 陵墓

三十四

寂然方怛悵如失忽門外喧傳官至則已率健役汛弁擒賊劉蠻子來矣旁觀者皆驚喜蓋受呈後授計偵人率徒具械從閒道直抵賊巢時方五鼓遂掩擒劉蠻子於夢中或叩之曰以官初下車未作準備也繼任寧鄉船戶俱給腰牌賊風頓息行旅感之所至整飭書院一時成就人才如李君罕胡君光瓚周君宏漣皆出爲循吏嘉慶四年協運京銅赴金陵交卸過湖晚泊忽風浪大作四十八船無一存者舟中人面皆土色公危坐默禱見空中燈火隱隱若簫鼓聲方驚愕間則四圍牆進船已齊集僉曰此洞庭君救護也公知爲神明默相具

衣冠拜之而去五年權常德府通判會屬邑水災公親往督賑得無濫闕六年九年兩調鄉試受卷官每與諸生指微瑕有曲全獲售者十年丁天木公憂回籍守制服闋遂以太孺人年邁請終養越二載太孺人卒公悲思過慟精神日漸衰耗未浹歲以病卒於家公生平孝思純篤宦游二十年雖迎養未遂而珍羞藥餌不絕於途惟

貶封未請屬纊時猶以爲憾與弟筌友愛尤爲純摯處己以清操自勵不務華美筮仕後愈崇儉樸惟緩急推解之際時多豪舉嘗積書數櫥謂諸子曰吾居官不昧取一錢

德陽縣新志

卷七 陵墓

三十五

居鄉不妄行一事宦囊只此數編耳汝曹世守勿替後將有大抗吾宗者其必勉之公生於乾隆癸亥年月日卒於嘉慶己巳年月日葬於榮華鄉甲山之陽淑配王安人太學生道公女後公二十一年卒子二傳謀傳詠竝補弟子員孫八人紀賢紀灼紀爐紀燼紀炳紀煜紀炯紀煒炳煜皆邑庠生惜也燠宦南遲未及相見公以嘉慶乙丑報丁歸而余以丁卯始奉

簡命得叨南臬至則聞勦建星沙 宗聖祠廟構基址聯譜系皆賴公力以有成也然先達名高望重雖未嘗登公之堂而得謁公之像亦適洽景仰素心矣

李藩墓在縣東村龍家溝

李价臣先生墓表

裴顯忠 邑令

予蒞德陽以來公餘輒訪先哲之文獻聞縣竹有价臣李先生人品學問文章經濟皆當時士類之軌矚不禁欣然慕之偶以公至東村則見先生墓在焉曰先生固邑人耶里中人曰然先生縣竹解元卜葬於斯今其孫人籍德陽由廩貢生候補訓導久矣是已德陽人也久之與縣竹令會於境上或曰李芳谷敘樂園距此未遠盍往游焉芳谷者蓋先生之孫也入其門藹然而可親履其庭秩然而有敘因以嘆价臣先生之教澤於其孫

德陽縣新志

卷七 陵墓

三十六

見之矣今年春芳谷肅然攜其先人之行略入謁曰此德揚舅氏東光令侯宗秩之所述也墓表未銘敢以爲請予素欽芳谷之方行矩步不能以不文辭謹案行略云先生姓李氏諱藩字价臣先世系出隴西崇禎末避兵失譜高祖以上無可攷曾祖連章公生子六由平武遷居縣竹縣之南里祖玉隆公生子三長朝棟庠生以子維貴

□贈修職郎次子卽太封翁雲蟠公諱朝梁以先生貴

加贈修職郎三子朝舉國學生雲蟠公生子三長睿庠生季樞貢生仲卽先生也先生生而穎敏性醇篤不貪兒戲七

歲從伯兄讀四子書過目不忘蒙師郭玉樹驚嘆曰此阿難也年二十受知於學使河南蔣公蔚補弟子員復面試給以筆札詩扇荷囊亟加獎許明年科試第一遂食廩餼甲子丁卯兩薦未售學使河南葛公峻起取置第一曰汝文氣度春容遠到才也來科選拔非汝莫屬矣時先生有宿疾未愈及期不終卷而出仍置第三覆之日公問故以病對曰愈乎對曰愈矣曰愈則能盡所長遂置第一旋膺癸酉科選拔

廷試二等以教諭銓補復應丙子鄉試已定榜矣彭山令浙江張公鳳翥得先生卷力薦之主司亦以元卷未協命

德陽縣新志

卷七 陵墓

三十七

再校及得卷喜甚拆彌封爲貢生又疑其老監試潼川守浙江費公元龍曰此生癸酉拔貢品學兼優余前觀風緜州嘗置第一乃定爲元於是先生之名噪於都下蓋蜀墨入京坊選者自先生始云旣而春官不第羶櫟西歸知名不可以虛立功不可以倖成乃退而借補訓導於天彭彭之學宮積廢已久謀之令有難色先生曰是余責也捐資倡之邑人士咸樂與成之不期年而工竣紳庠素重先生延爲九峰書院山長諸生至者皆因才教誨不倦循循善誘造就良多歲庚辰恭逢

萬壽覃恩而太封翁與徐太孺人適值八十生辰同膺

封典一時僚友生徒製錦稱觥何其榮也觀察山東卜公寧一

以爲第一人才而任冷職有以也夫當是時京兆尹成都顧密齋先生掌教錦江書院先生以華陽教諭監院事著作悉與論定無所偏倚浙江錢公琦爲方伯雲南李公因培爲廉訪皆以蘊藉風流相賞而先生淡然處之若素其宦情固已薄矣厥後兩授西昌教諭一乞終養一以疾皆不就及部銓知縣又以老辭居敘樂園者垂四十年無慍色無厲言濟困扶危不以爲德嘉慶庚申達匪跳梁於涪東德縣鄉里爲之振動邑令賈文詔素重先生遣役迎避先生不可曰親族鄰人日夕倚我

德陽縣新志

卷七 陵墓

三十八

爲去畱我不忍委諸溝壑也乃聚鄉人爲團練製兵器講武事勸之以孝友激之以忠義命二子擇里中之幹辦者共治之鄉人得恃以免播遷之苦州牧欲以武功請於大府先生笑而罷之居多暇日惟以琴書自娛享年八十有三所著有晚晴軒文稿四卷白石山房詩稿二卷淑配唐孺人先生卒子二先根增貢生先本候選鹽運司知事俱以友愛見稱於時孫四汝長汝達先根子德揚廩貢生候補訓導名揚貢生候補州判先木子曾孫錫三監生錫五從九錫九錫百先生以嘉慶甲子年三月十三日卒葬於德陽東村龍家溝銘曰浮中

之南昇盤之東藏茲遺蛻企彼仙蹤激泓穆穆聳翠熊  
熊靈區秘宅孕祉含冲朱鳥元武白虎蒼龍匪曰厚之  
福德盈躬遺文在世靡不有終悠悠奕禩永仰高風

義冢附

義冢舊在北門外 文昌廟側久廢乾隆中知縣周際虞  
清理勘丈得一百二十五畝七分又餘地數畝招人看  
守後又荒蕪嘉慶二十四五年知縣王陞元新置三所  
一在舊義冢側四畝三分載糧一錢 一在南門外三  
畝三分零載糧三分六釐 一在南門外三畝八分載  
糧五分一釐

德陽縣新志

卷七 陵墓

三十九

防護義冢說

周際虞

義冢之設所以瘞旅魂及貧不能營地以葬者而風俗  
之厚薄因之德陽舊有義冢一處乃頻年以來凡旅櫬  
之寄殯暨一二孤窮輩率丐寺宇隙地而從前之安厝  
斯土者浸爲狐兔之所窟宅遙望北邙蒿萊滿目雖牧  
豎樵夫鮮不過墟動心者何哉蓋無主之者故半爲人  
蠶食半委之荆榛也余目擊心傷因爲勘丈得地一百  
二十五畝七分爲之正其四隅定其方向而鄰近之界  
限無不劃然清理餘地約數畝招人開墾不取其值俾  
司看守焉余不禁愴然有感也夫死者之有窀穸猶生

人之有室廬故仁人利濟先恤無依而王政恩施兼及  
枯骨顧乃悲風慄慄暮雨蕭蕭紅日陰霾白楊衰颯青  
燐鬼火長悲月夜之魂鶴唳鵲啼誰弔長眠之客孰非  
同類忍使白骨含悲亦有人心致令碧山帶恨從茲勘  
丈之後樵薪不加牛羊勿踐庶已葬者無暴露之虞而  
死亡者鮮委棄之患矣既已告其鄰人遂從而筆諸說